



Grönnegeer Bond

Bocht Oosterdaip 52, 9641 JL Veendam Gn

Postgiro van de GB: 3 58 80 84

Baank van de GB: Rabobaank, 9636 AS Zuudbrouk Gn,

baankrekennummer: 3 49 20 67 16

baaident op noam van: Aalgemain breukmeester GB,

Hillegeloaan 10, 9636 CN Zuudbrouk Gn

Nijjoarsbraif 1982

Bèste vrönd,

Ik hoop, dat le t ook lezen hebben. Jan Hensema het t ja zo mooi oetrekend in t Nijbsblad (van n 18.11.81, blz 23): Wie hier in t noorden hebben nog 7,4 miljaard te-goude in nHoag.

Dat is n bult geld hur: 7.400.000.000,— gulden!

En hou komt e doar den aan? Nou, aiglieks hait simpel. An n 1.1.82 tou het stoat veur t eerdgas 77,6 miljaard gulden inbeurd. In t noorden woont elf persint van Nederlaandse bevolken. Wie mozzen doarom teminnend tien persint van dij 77,6 miljaard hebben. Dat is 7,76 miljaard. Wie hebben 364 miljoun kregen, dat is 0.364 miljaard. En $7,76 - 0,364 = 7,4$ miljaard.

T ainegste beswaar, wat wie tegen Hensema hebben, is dat e wat loat komt mit zien sievers. **Wie** hebben in 1974 al zegd, wat Hensema nou eerst zegt, dat t noorden slim tekört doan wort. Sievers wazzen dou nog nait zo grof as nou, mor ons wazzen ze al dudelk genogt.

En dat gemainten en euliemoatschoppijen (Shell en Esso) ook nog es dik an t gas verdainen, dat wait Hensema net zo goud as wie.

Hou mout we nou aan mit Hensema's rekenkunsten? Nou, wie mouten dit van-zulm an elkenain vertellen. **Van t Laauwersmeer an Dollerd tou, van Drinde an t Wad tou mout dit as n störmvloud over Grönnen spuien:** 7,4 miljaard, 7,4 miljaard, 7,4 miljaard. En den mout wie dr bie zeggen, dat ze t mit nkander doan hebben: PvdA, CDA, D66 en VVD; D66, PvdA, VVD en CDA; VVD, D66, CDA en PvdA; CDA, PvdA, D66 en VVD. En wie mouten dr bie zeggen, dat gainain Grönnegeer dizze partijen kaizen mag bie Stoatenverkaizens, aans dut e zokzulm en zien kinder tekört. En wie mouten zeggen, dat tr mor ain partij in Grönnen is, dij an dit spullechie n in moaken kin en wil: Ons Grönnegeer Bond. Dat mout we zeggen en dat mout we elkenain zeggen en dat mout we aal weer zeggen.

Bèste vrönd, n nij joar ligt veur ons, vol mit zien beloften, mor ook vol van zien draaigens, n joar vol van veul waark veur ons. Hou dat le mit de acceptgirokoart aan mouten, dij k bie dizze braif in doan heb, dat wait le wel. Veul daank an aal dijent, dij dat verleden joar al wozzen. In t komende joar, n verkaizensjoar, heb wie veul oetgoaven te doun. Doarom hoop ik, dat le Joen riejoale biedroagen nog in jannoewarie overmoaken willen. Rinde is ja te hoog om veul geld te lainen.

Loat we mit nkander van 1982 veur Grönnen n goud joar moaken. Veul zegen veur Joe en Joenent.

Joenent veur Grönnen,

Haarm Maaijer
(Drs. H. H. Meijer)